



Mahasiswa jelajah kampung dalam Kembara Pahang FM bersama UMP

Seramai 52 mahasiswa dan warga kerja Universiti Malaysia Pahang (UMP) menyertai Program Kembara Radio Malaysia Pahang bersama UMP untuk mendekati masyarakat dan komuniti di Kampung Janda Baik Bentong pada 3 Februari 2013 yang lalu.

Pelbagai program disusun bagi mengeratkan hubungan melibatkan mahasiswa dan warga kerja UMP dan RTM serta penduduk kampung. Di antaranya adalah pertandingan mewarna kanak-kanak, sukaneka, motivasi pelajar, ceramah agama, kenduri rakyat dan pameran bagi mempromosikan universiti.

Ketibaan rombongan mahasiswa dan konvoi RTM dan UMP disambut Pengerusi Jawatankuasa Kemajuan dan Keselamatan (JKKK) Kampung Janda Baik, Haji Jahari Arop dengan sambutan yang cukup meriah termasuk kehadiran seramai 20 di kalangan ibu dan ayah angkat yang hadir bersama ahli keluarga masing-masing.

Program bermula dengan slot motivasi di kalangan seramai 50 pelajar sekolah yang akan menduduki peperiksaan Ujian Penilaian Sekolah Rendah (UPSR) dan Peperiksaan Menengah

Rendah (PMR) pada tahun ini, manakala pada sebelah malamnya diadakan Ceramah Maulidur Rasul yang disampaikan Timbalan Kadi Daerah Bentong, Haji Roslan Mat Isa.

Naib Canselor UMP, Profesor Dato' Dr. Daing Nasir Ibrahim berkata, UMP amat berbesar hati kerana berpeluang menjadi rakan kongsi Radio Malaysia Pahang FM untuk menjayakan pelaksanaan program kembara ini.

"Kesempatan ini ditambah pula dengan ruang masa yang terluang sempena cuti semester merupakan peluang keemasan kepada para peserta dari UMP untuk memasyarakatkan diri mereka melalui pelbagai aktiviti yang diatur sepanjang dua hari program berlangsung.

"Walaupun dibatasi oleh perimeter masa yang terhad, namun permukiman singkat di Kampung Janda Baik ini tetap mampu menampilkan enam aktiviti yang menasaskan empat segmen komuniti kawasan ini iaitu Kanak-kanak, Remaja, Masyarakat dan Pendidikan," katanya dalam Majlis Perasmian Penutup Program Kembara Radio Malaysia Pahang FM bersama UMP di Masjid Abu Bakar

Kampung Janda Baik.

Dato' Dr. Daing berkata, pelaksanaan program ini adalah manifestasi komitmen UMP untuk memasyarakatkan kewujudannya sebagai sebuah Institusi Pengajian Tinggi Awam agar kewujudannya dirasai, kehadirannya dapat dilihat dan suaranya didengari masyarakat.

Tambah beliau, sebagai sebuah universiti yang memfokus kepada bidang kejuruteraan, sains dan teknologi, UMP turut komited untuk meningkatkan literasi ilmu masyarakat. Justeru katanya, program ini berjaya mendokong objektif dalam memasyarakatkan kampus dengan menjalankan pelbagai aktiviti yang memberi nilai tambah kepada komuniti.

Selain itu, dapat menyuburkan hubungan yang harmoni antara UMP dengan media dan masyarakat melalui perkongsian pintar serta mempromosikan jenama UMP sebagai sebuah Universiti Teknologi Pilihan Utama.

Sementara itu, Haji Jahari berkata, pihaknya gembira atas kesudian warga UMP dan RTM yang hadir berkampung di Janda Baik yang kaya dengan produk inap desa dan tumpuan pelancong asing bagi menikmati kehidupan suasana kampung.

Katanya, aktiviti yang dijalankan dapat memberi manfaat terutamanya dalam memberi suntikan semangat kepada anak-anak kampung, malah mahasiswa sendiri dapat mengeratkan hubungan bersama keluarga angkat masing-masing.

Hadir dalam majlis, Ketua Pemuda Bahagian Bentong, Datuk Johari Harun, Penolong Naib

Canselor (Hal Ehwal Pelajar dan Alumni), Profesor Dr. Yuserie Zainuddin dan Penyelaras Teknikal RTM Pahang, Fazmal Nizam Zainudin dan Yang di-Pertua Majlis Perwakilan Pelajar (MPP), Abdul Na'em Suhaime.

Bagi Mohd Dum Taib, 47 yang mengusahakan chalet Rumah Bonda Homestay di Janda Baik berpendapat beliau berbangga dapat menyertai program bersama-sama mahasiswa UMP sebagai anak angkatnya iaitu Muhammad Ridhwan Ismail dan Mohammad Aienuddin Jamaludin.

Katanya, kesempatan masa yang sedikit dapat memberi peluang baginya membawa mahasiswa melawat sekitar kampung dan menjalankan aktiviti menjala ikan di sungai serta memetik buah duku di dusun miliknya.

Program diakhiri dengan kenduri rakyat dengan sajian menu kampung seperti gulai kawah, opor daging dan ulam-ulam untuk dinikmati bersama lebih 500 penduduk kampung.

